



Reuniaun ho Parseiru Dezenvolvimentu sira Timor-Leste nian 2009

3 Abril 2009

Deklarasaun husi Representante Espesiál Sekretáriu-Jerál nian ba Timor-Leste Dr. Atul Khare

Exelénsia Señór Prezidente Repúblika Demokrátika Timor-Leste nian,
Dr. José Ramos-Horta,
Exelénsia Señór Primeiru-Ministru, Sr. Xanana Gusmão,
Exelénsia Señór Ministru Negósius Estranjeirus nian, Sr. Zacarias Albano da Costa,
Exelénsia Señora Ministra Finansas nian, Sra. Emília Pires,
Exelénsia Señór Ministru sira no representante sira husi Governu Timor-Leste nian, Señór
Deputadu sira;
Exelénsia, Xefe Delegasaun no representante sira husi comunidade internasionál, no
kolega sira husi Sede rejionál ONU nian,
Diretór Banku Mundiál nian ba Timor-Leste ne'ebé ami respeita, Sr. Nigel Roberts,
Representante Espesiál Adjuntu Sekretáriu-Jerál nian ba Timor-Leste, Sr. Finn Reske-
Nielsen no Sr. Takahisa Kawakami,
Kolega no belun sira,

Ha'u laran-haksolok atu mai hato' o diskursu ba reuniaun importante ida-ne'e, reuniaun hanesan ne'e ba dala rua iha Timor-Leste dezde krize 2006. Iha tinan ida-ne'e mós Konsulta Populár ne'ebé loke dalan ba restaurasaun independénsia Timor-Leste nian halo tinan sanulu. Delegasaun doadór númeru boot ne'ebé halibur iha-ne'e iha loron ohin hatudu kompromisu boot husi comunidade internasionál hodi apoia Governu no povu Timor-Leste nian.

Timor-Leste agora daudaun iha pás nia laran no seguransa estabelese filafali tiha ona. 2008 afinál sai nu'udar tinan di'ak ida ba Timor-Leste, maski akontesimentu aat iha Feveireiru. Iha ona progresu significativu ho dezlokadu sira ne'ebé fila fali ba uma no sira-nia reintegrasaun no mós Petisionáriu sira tama fali iha sosiedade nia leet. Ema hetok fiar instituisaun sira Estadu nian, inklui setór seguransa nian. PNTL besik atu hahú ona kaer fali responsabilidade primária polisiamentu nian iha distritu ida, Lautém, ne'ebé kumpre kritériu prontidaun hirak-ne'ebé estabelese liuhosi konkorda malu. Dezafiu agora maka garante sustentabilidade iha tempu naruk ba progresu ne'ebé akontese ona iha restaurasaun pás no seguransa nian. Iha prosesu ne'e, tempu to'o ona ba ita atu foka ba mudansa husi rekuperasaun liutiha-konflitu kedas no estabilizasaun emerjénsia nian ba agenda dezenvolvimentu nian. Hanesan Sekretáriu-Jerál dehan iha ninia diskursu ba Konsellu Seguransa iha 19 Feveireiru, no ha'u sita "Ita hahú 2009 ho orizonte moos. Nasaun ne'e ikusliu bele ona fó nia atensaun tomak ba knaar esensiál hodi harii fundasaun maka'as no

duravel ne'ebé krusiál ba estabilidade no prosperidade iha tempu naruk", sitasaun hotu ona.

Misaun Integrada Nasoins Unidas nian iha Timor-Leste (UNMIT), ho apoiu husi forsa seguransa internasionál sira, hala'ó hori uluk no sei kontinua hala'ó papél signifikativu hodi fó assisténsia ba Timor-Leste atu mantein situasaun seguransa estavel no sei mós kontinua ninia serbisu iha área seluseluk hotu ne'ebé nia iha responsabilidade tuir mandatu. Konsellu Seguransa Nasoins Unidas nian simu ho laran Estratéjia ba Tempu-Klaran 2009-2013 ho ninia objetivu sira, parámetru-referénsia no marku sira. Kuadru komún ida-ne'e, ne'ebé dezenvolve liutiha konsulta luan ho parte envolvida sira husi Timor-Leste no parseiru internasionál sira, fornese baze ida ba ita-nia esforsu lisuk hodi promove pás sustentavel ba nafatin.

Estratéjia ba tempu-klaran, ne'ebé inkorpora kompletamente perspetiva Objetivu sira Dezenvolvimentu Milénium (ODM) nian, kobre objetivu estratéjiku haat, maka:

- 1) Instituisaun sira Setór Seguransa nian ne'ebé efikás, profisionál no resiliente natoon, no respeita no proteje Direitus Umanus;
- 2) Instituisaun sira Justisa nian, nu'udar parte husi sistema judisiál no penál asesivel no kredível, ne'ebé respeita Estadu Direitu nian, no mós sistema Justisa independente;
- 3) Governasaun Demokrátika Sustentavel, liuhosi instituisaun sira Estadu no sosiedade nian ne'ebé hetok haberan kultura institusionál diálogu nian; no
- 4) Dezenvolvimentu Ekonómiku no Sosiál, liuhosi, ekonomia saudavel, inkluziva no sustentavel ne'ebé pratika solidariedade sosiál.

Prioridade fundamentál sira-ne'e barak sei prezisa atensaun nafatin ba tempu naruk liu duké rohan otas UNMIT nian. Krize 2006 nia abut balu no konsekuénsia signifikativa oioin sei kontinua nafatin. Porezemplu, maski iha susesu ho dezlokadu fila fali ba uma, sei iha nafatin nesesidade atu kontinua foka ba rekuperasaun iha comunidade hirak ne'ebé simu sira atu prevene tensaun mosu fali. Ho relasaun ba ida-ne'e, Nasoins Unidas kontente ho aumentu orsamentu ba Provedoria, nu'udar instituisaun nasional atu promove Estadu Direitu nian no responsabilizasaun ba abuzu direitus umanus iha pasadu no foin daudaun ne'e.

Señór no Señora sira,

Timor-Leste rahun-di'ak tanba iha rekursu natural oioin. Ita bele dehan katak ne'e nasaun riku natoon, maibé ho ema kiak barak. Iha-ne'e mak iha dilema, rekursu natural sira hetok menus bainhira tempu la'ó hela ba oin, tanba sira-nia esplorasau no uzu, enkuantu nesesidade no espetativa sira husi ema ba dezenvolvimentu konserteza sai boot liu ba beibeik. Nune'e, polítika finanseira responsavel sei prezisa tau hamutuk ho programa investimentu públiku ekilibradu didi'ak ne'ebé sei bele ajuda hamosu kreximentu ekonómiku no promove dezenvolvimentu umanu no mós garante viabilidade ba tempu-naruk ba Fundu Mina-Rai. Fundu kontinua nu'udar fonte boot mesak ida de'it ba reseita Timor-Leste nian, no tenke kontinua hetan jestaun tuir lei atu garante reseita previzível husi mina-rai no gás iha tempu-naruk.

Jestaun ekuitativa ba rikusoin nasional, ne'ebé konsidera mós nesesidade comunidade vulneravel no feto sira-nian, ne'e mós krusiál. Progresu balu ba iguallade jéneru nian iha ona, maibé sei kuran buat oioin iha protesaun ba vítima sira husi violénsia seksuál ka

violénsia bazeia ba jéneru, ne'ebé konstitui kuaze kahaat [*seperempat*] ida husi krime sira ne'ebé ema halo iha nasaun ne'e. Proposta-Lei Kontra Violénsia Doméstika agora daudaun iha Parlamentu, no ha'u espera nia adosaun no implementasaun. Bele mós sai util atu haree-tuir fluksu ajuda nian hodi buka hatene sira-nia impaktu ba objetivu sira igualdade jéneru nian no haberan feto, atubele integra di'ak liután perspetiva jéneru iha finansimentu ba dezenvolvimentu. Programa ba partisipasaun no serbisu ba foin-sa'e sira mós investimentu matenek ba Timor-Leste nia futuro. Ho relasaun ba ida-ne'e ha'u hakarak mós subliña katak importante atu habiit setór edukasaun no formasaun.

Nesiedade dezenvolvimentu sira iha Timor-Leste kontinua boboot nafatin no sei preziza assisténsia nafatin husi li'ur durante tinan hira tan. Krize finanseira globál bele aumenta impaktu husi hamenus kompromisu Assisténsia Ofisiál ba Dezenvolvimentu (ODA) ba Timor-Leste, liuliu durante faze sensível, ne'ebé ita besik ona atu tama no ne'ebé ita tenke garante sustentabilidade ba estabilidade. Nune'e ha'u enkoraja doadór hotu-hotu atu kontinua sira-nia assisténsia ba Timor-Leste ho maneira previzível. Ho relasaun ba ida-ne'e, ita tenke la'o ba oin hodi hala'o koordenasaun di'ak liután entre parseiru dezenvolvimentu sira, ho lideransa husi autoridade nasional sira Timor-leste nian, no aliña assisténsia ba dezenvolvimentu ho prioridade no prosesu nasional sira atubele hetan impaktu másimu. Presidente Ramos-Horta no Primeiru-Ministru Xanana Gusmão rua hotu ko'alia beibeik kona-ba aliñamentu no transparénsia di'ak liután iha fluksu sira tulun internasionál nian atu bele iha efeitu di'ak liután iha terrenu no atu halo progresu tebes hodi luta kontra kiak, no ha'u fiar katak ita bele hatán sira-nia lia-husu ne'e.

Serbisu susar atu hasoru dezafiu sira iha oin foin hahú. Reuniaun ida-ne'e di'ak atu sai arranka-fatin hodi hatán kolektivamente. Nune'e mai ita aproveita oportunidade ne'e atu halakon ba nafatin instabilidade nia prezensa aat husi Timor-Leste no lori pás ne'ebé duravel ba timoroan sira-nia vida atu halo sai realidade vizaun Timor-Leste nian ne'ebé iha dame nia laran, prósperu, estavel no demokrátiku, ho abut naruk iha respeitu ba direitus umanus no Estadu Direitu nian.

Ha'u hato'o obrigadu ba Ita-Boot sira hotu no ha'u espera katak Ita-Boot sei hala'o reuniaun ho susesu no ho deliberaun produtiva oioin.